

## অর্থনীতি

# অসমাপ্ত কাজ শেষ করতেই নতুন ৩৭০০ কোটি টাকার প্রকল্প

প্রতিবেদক: নিজস্ব প্রতিবেদক

প্রকাশের তারিখ: বৃহস্পতিবার, ১০ সেপ্টেম্বর ২০২৬, ০২:৫২ PM



রপ্তানি বহুমুখীকরণের লক্ষ্য নিয়ে নেওয়া আগের প্রকল্পের কাজ শেষ না হওয়ায় বিশ্বব্যাংকের প্রায় ৩৮৭ কোটি টাকার ঋণ বাতিল হয়েছে। গাজীপুরের কালিয়াকৈরে নির্মিত দুটি প্রযুক্তি কেন্দ্রও প্রয়োজনীয় যন্ত্রপাতির অভাবে এখনো পুরোপুরি চালু হয়নি। কেন্দ্র দুটি পরিচালনায় আন্তর্জাতিক অংশীদার নিয়োগের উদ্যোগও বাস্তবায়িত হয়নি।

এ অবস্থায় অসমাপ্ত কাজ শেষ করার পাশাপাশি নতুন অবকাঠামো নির্মাণে প্রায় ৩ হাজার ৭০০ কোটি টাকার আরেকটি ঋণনির্ভর প্রকল্প নিতে যাচ্ছে সরকার। পুরোনো প্রকল্পের দুর্বলতা কাটিয়ে ওঠার আগেই বড় অঙ্কের নতুন বিনিয়োগের উদ্যোগ নিয়ে প্রশ্ন উঠেছে।

ডিপেনিং এক্সপোর্ট ডাইভারসিফিকেশন, ড্রেড ফ্যাসিলিটেশন অ্যান্ড এমপ্লয়মেন্ট জেনারেশন নামের প্রকল্পটির প্রস্তাব করেছে বাণিজ্য মন্ত্রণালয়। তৈরি পোশাকের ওপর রপ্তানিনির্ভরতা কমানোই এর মূল লক্ষ্য। চামড়া ও চামড়াজাত পণ্য, পাদুকা, কৃষি ও খাদ্য প্রক্রিয়াজাতকরণ, তথ্যপ্রযুক্তি, পাট, ওষুধ ও আসবাবসহ সম্ভাবনাময় খাতের রপ্তানি বাড়াতে সহায়তা দেওয়া হবে।

প্রাথমিকভাবে প্রকল্পটির ব্যয় ধরা হয়েছে ৩০ কোটি ডলার। বাংলাদেশি মুদ্রায় এর পরিমাণ প্রায় ৩ হাজার ৭০০ কোটি টাকা। পুরো অর্থই বিশ্বব্যাংকের ঋণ হিসেবে নেওয়ার পরিকল্পনা রয়েছে। ২০২৭ সালের জানুয়ারি থেকে ২০৩০ সালের ডিসেম্বর পর্যন্ত প্রকল্পটি বাস্তবায়নের প্রস্তাব করা হয়েছে।

পরিকল্পনা কমিশনে পাঠানো প্রকল্পের প্রাথমিক উন্নয়ন প্রকল্প প্রস্তাব (ডিপিপি) এবং আগের [এক্সপোর্ট কম্পিটিটিভনেস ফর জবস] প্রকল্পের নথি পর্যালোচনা করে এসব তথ্য পাওয়া গেছে। নতুন প্রকল্পের বড় একটি অংশের অর্থ ব্যয় হবে আগের প্রকল্পের অসমাপ্ত কাজ শেষ করতে।

২০১৭ সালে [এক্সপোর্ট কম্পিটিটিভনেস ফর জবস] প্রকল্পটি নেওয়া হয়েছিল। এর লক্ষ্য ছিল তৈরি পোশাকের বাইরে চামড়া ও চামড়াজাত পণ্য, পাদুকা, হালকা প্রকৌশল ও প্লাস্টিকসহ বিভিন্ন খাতের রপ্তানি সক্ষমতা বাড়ানো। এ জন্য আধুনিক প্রযুক্তি, পরীক্ষাগার, মান যাচাই ও সনদ সুবিধা এবং দক্ষ জনবল তৈরির পরিকল্পনা ছিল।

এই প্রকল্পের আওতায় গাজীপুরের কালিয়াকৈরে দুটি প্রযুক্তি কেন্দ্র নির্মাণ করা হয়। একটি চামড়া ও পাদুকা খাতের জন্য [ডিজাইন অ্যান্ড টেকনোলজি সেন্টার ফর লেদারগুডস অ্যান্ড ফুটওয়্যার]। অন্যটি প্রকৌশল খাতের [সেন্টার ফর এক্সিলেন্স ফর ইঞ্জিনিয়ারিং অ্যান্ড টেকনোলজি]।

তবে ভবন নির্মাণ শেষ হলেও কেন্দ্র দুটির জন্য প্রয়োজনীয় আধুনিক যন্ত্রপাতি কেনা হয়নি।

সরকারি নথি অনুযায়ী, যন্ত্রপাতি কেনার জন্য বিশেষজ্ঞদের নিয়ে কারিগরি কমিটি গঠন করা হয়। বিশ্বব্যাংকের অনুমোদনের পর ২০২৬ সালের ২৫ জানুয়ারি দুটি আন্তর্জাতিক দরপত্র আহ্বান করা হয়। ১২ মার্চ দরপত্র মূল্যায়ন শুরু হয়। তবে ঠিকাদার নির্বাচন, চুক্তি, যন্ত্রপাতি সরবরাহ, স্থাপন ও কমিশনিং নির্ধারিত সময়ের মধ্যে শেষ করা সম্ভব হয়নি।

এ অবস্থায় প্রকল্পটির ঋণের মেয়াদ ২০২৬ সালের ৩১ ডিসেম্বর পর্যন্ত বাড়ানোর অনুরোধ জানায় সরকার। বিশ্বব্যাংক এতে সম্মতি দেয়নি। ফলে প্রকল্পের অব্যবহৃত প্রায় ৩ কোটি ১৫ লাখ ডলার বা ৩৮৬ কোটি ৭৩ লাখ টাকার ঋণ বাতিল হয়ে যায়। একই সঙ্গে যন্ত্রপাতি কেনার দরপত্রও বাতিল করতে হয়।

কেন্দ্র দুটি পরিচালনার ক্ষেত্রেও জটিলতা ছিল। পেশাদারভাবে এগুলো পরিচালনার জন্য আন্তর্জাতিক অংশীদার নিয়োগের পরিকল্পনা নেওয়া হয়েছিল। এ বিষয়ে জার্মান উন্নয়ন সংস্থা জিআইজেড এবং দক্ষিণ কোরিয়ার কোরিয়ান প্রোডাক্টিভিটি সেন্টারের সঙ্গে আলোচনা এগিয়েছিল। তবে ঋণের মেয়াদ শেষ হওয়ায় সেই উদ্যোগও বাস্তবায়িত হয়নি।

নতুন প্রকল্পে কালিয়াকৈরের ওই দুই প্রযুক্তি কেন্দ্র সচল করতে ৩ কোটি ৪০ লাখ ডলার ব্যয়ের প্রস্তাব করা হয়েছে। পাশাপাশি মুন্সীগঞ্জের সিরাজদিখান ও চট্টগ্রামের মিরসরাইয়ে আরও দুটি প্রযুক্তি কেন্দ্র স্থাপনের পরিকল্পনা রয়েছে।

নতুন দুই কেন্দ্রের অবকাঠামো নির্মাণে ৬ কোটি ৬০ লাখ ডলার এবং যন্ত্রপাতি ও সক্ষমতা তৈরিতে ৪ কোটি ৪০ লাখ ডলার ব্যয়ের প্রস্তাব করা হয়েছে। চারটি প্রযুক্তি কেন্দ্রের পেছনে মোট ব্যয় হবে ১৪ কোটি ৪০ লাখ ডলার।

নতুন প্রকল্পে চামড়া ও পাদুকা, কৃষি ও প্রক্রিয়াজাত খাদ্য, মাছ ও চিংড়ি, হস্তশিল্প, তথ্যপ্রযুক্তি, সেমিকন্ডাক্টর, পাট, মানবসৃষ্ট তন্তু, ওষুধ ও আসবাব খাতকে সহায়তা দেওয়ার পরিকল্পনা রয়েছে।

সরকারের লক্ষ্য, এসব খাতের সক্ষমতা বাড়িয়ে তৈরি পোশাকনির্ভর রপ্তানি কাঠামো থেকে বহুমুখী রপ্তানি ব্যবস্থায় এগিয়ে যাওয়া।

## এ বিভাগের আরও খবর



পাঁচ বছরে বাংলাদেশে আরও ৫ বিলিয়ন ডলার বিনিয়োগ আনবে অ্যামচ্যাম  
আগামী পাঁচ বছরে বাংলাদেশে অতিরিক্ত ৫ বিলিয়ন মার্কিন ডলারের বিনিয়োগ আনতে সরকার ও আমেরিকান চেম্বার অব কমার্স ইন বাংলাদেশ (অ্যামচ্যাম) একসঙ্গে...



উৎপাদন-বিনিয়োগনির্ভর অর্থনীতির লক্ষ্য, পরিকল্পনা চলছে: তিতুমীর  
২০৩৪ সালের মধ্যে বাংলাদেশকে এক ট্রিলিয়ন ডলারের অর্থনীতিতে উন্নীত করার লক্ষ্য সামনে রেখে স্বল্প, মধ্য ও দীর্ঘমেয়াদি পরিকল্পনা নেওয়া হচ্ছে বলে...



ভরিতে ৪ হাজার ৩৭৪ টাকা কমল সোনার দাম  
দেশের বাজারে সোনার দাম আরও কমিয়েছে বাংলাদেশ জুয়েলার্স অ্যাসোসিয়েশন (বাজুস)। অ্যাটসহ প্রতি ভরি সোনার দাম সর্বোচ্চ ৪ হাজার ৩৭৪ টাকা কমানো হয়েছে...



রাষ্ট্রায়ত্ত ৬ ব্যাংকে খেলাপি স্বণ প্রায় দেড় লাখ কোটি টাকা: অর্থমন্ত্রী  
রাষ্ট্রায়ত্ত ছয় ব্যাংকের খেলাপি স্বণের পরিমাণ প্রায় দেড় লাখ কোটি টাকা বলে জানিয়েছেন অর্থমন্ত্রী আমির হসন মাহমুদ  
সৌখুরী।রবিবার (৬ সেপ্টেম্বর)...

Copyright Dhaka Probe

অনলাইন সংস্করণ পড়তে ভিজিট করুন: <https://www.dhakaprobe.com/economy/osmapt-kaj-shesh-krtei-ntun-3700-koti-takar-prklp>